

# [純愛]只想再見妳

作者: 大意或失賓洲

Powered by [紙言](#)

# 序言

如果我有逆轉的超能力,我希望可以回到過去,勇敢咁同妳講聲「我愛你」

# Ep1

「呤呤呤~」無情既鬧鐘聲一下子將我嘅美好既夢境拉回現實。

「俾我..瞓多陣先啦...」

但鬧鐘完全無理我既感受,不斷嘈,不斷嘈,就算我搵熄咗佢,都仲不斷嘈,直到我身心俱疲,放棄掙扎。一落床,再望一望個鬧鐘

「哇,已經七點半喇,今次實遲到啦」我即刻係衣櫃求其拎件校服,連牙都無刷,就一嘢衝出門口

大家好,我叫浩賢,平時大家都叫我做賢仔,今年十五歲,喺九龍城區某間男校讀緊中四。

唔知係咪因為讀男校既關係,我一直以來都係異性絕緣體。我自問自己個樣正正常常,又唔係肥屍大隻,亦都唔係d油頭毒擦,但先咪話女朋友啦,連普通既異性朋友都係十隻手指數得晒。眼見住身邊既朋友一個一個咁出pool,都真係咪話唔羨慕啊。

「喂~賢仔,又準備遲到啊」當我好趕咁跑返學校既時候,一個肥胖身軀突然係我身後出現。

「屌,肥強,你咪又一樣」

無錯,個個肥仔個名就叫做肥強。佢人如其名,係確確實實既一名肥仔。佢由中一開始就一直同我同班,係我其中一位好兄弟。由識佢到宜家,都係一樣咁肥,不過聽講佢小學曾經瘦到得返排骨,係升上中學個個暑假唔知受咗乜刺激先變到咁肥。

「叮噹叮噹~」正當我地準備跑入學校門口嘅時候,校園鐘聲就無情地響起。

「頂,又係差幾秒!」

「都反正遲咗,不如去M記食埋早餐先。」肥強提議。

「唉,唯有係咁啦,真係唔好彩啫」

## Ep2

「點啊,出pool未啊?」肥強一邊咬住塊熱香餅,一邊以關懷我既眼神問我。

「未啊,我點似得阿強哥你有咁多女啫」

雖然肥強係好肥,而且身上啲肉的確係肥肉,唔係肌肉,但就唔知點解極有異性緣,基本上每隔幾日就轉唔同女。

「咁使唔使我介紹幾件俾你?一場兄弟,咪話我唔益你喇!」

「咪!你d女咁open,我惹唔起啊!」

「妖!open d你又驚,但又日日喺度叫春,真麻煩!抵一世無女啦!」

「係我既真命天女未出現啫!」我不忿咁反駁佢。

「唉,咪講呢d住先,今個月第三次遲到,一陣間返到去又要俾粒睪丸扁」

「哈,好彩我唔係成日遲到啫。賢仔啊賢仔啊,你又冇女要陪,就好心你早d訓啦」

「屌!!!」

不出我所料,喺小息既時候,「睪丸」高sir捉咗我同肥強去教員室鬧我地一種。

「Damn!我遲到我既事啦,關粒睪丸咩事啫!明明校規寫得清清楚楚,遲到五次要收warning letter,七次就記缺點,九次就見家長啫,都有提過要見訓導!」

「咪就係囉」肥強附和我。

「好心你咁啦,明明係你咁做錯,又要賴人地,好心自己反省下啦。人地老師都一番好意啫...下省1000字」

「唉,得喇得喇,我怕左你。」我係佢準備發表長篇理論之前,先制止住佢。

呢位咁長氣嘅人兄叫做熹神,又係我其中一位好兄弟。我都已經唔記得點同呢d咁長氣既人做frd。雖然佢好麻煩,又好長氣,係折折實實既一位正義撚,不過又咁講,佢份人好重視義氣嘅。

「唉~總之又係多災多難既一日」

## Ep3

說時遲那時快,一日既堂話咁快又上完。

「肥強,熹神,一唔一齊去食lunch啊?」

肥強:「唔使預我喇,Jasmine 約左我去high tea」

「有異性冇人性,兄弟啗~ 熹神,咁你呢?」

熹神:「唔喇,阿媽約左我去食飯啊。」

「哼! 一個二個都係咁,唯有自己食自己啦。」我好無奈咁離開班房,獨自一人踏上回家既道路。

係地鐵上,無論前面,左面,右面,後面,都企住一對對著校服既情侶,彷彿好似恥笑緊我呢個冇人陪,冇人理既孤獨精。

我心入面不由得諗:鬼唔望你班友仔早日分手啊!

經過左一陣折磨,我一枝節咁逃離車箱,係屋企附近求其買d嘢食就返去。

食完lunch,做完功課,作為躺平派既我,梗係攤上床百無聊賴咁碌手機睇ig啦。

碌下碌下,睇下睇下,好快就乜都睇完,又開始覺得悶。正當我準備轉去打機,突然,ig彈左個notification出黎,話有人想follow我。

我睇到個profile pic之後心諗:「咦,望落似係靚女啗!」

作為一個異性絕緣體,見到有女仔想fol我,明明只係好少好少事,都即刻吸引到我既興趣。我諗都有諗就立即accept咗佢既request。

估唔到呢個咁細小普通既舉動,竟然對我之後一年,甚至更多既人生有好多影響。而呢段奇蹟般既邂逅,我相信呢一世都唔會忘記。

## Ep4

當我accept完佢request,冷靜下來,先醒起有可能佢只係亂fol,又或者係為咗刷佢自己既followers。  
唉,浩賢啊浩賢啊,係咪我單身得太耐,連呢d毒擦既ff都可以做得出!

一諗返起殘酷既現實,我就即刻覺得好冇引。

「算,諗咁多做乜? 死返去自弊打機算。」我自己同自己講

-----

「仔啊,  
好心你讀下書啦,下個月就考試喇。日日困住係間房都唔知做乜?」係食緊晚飯既時候,阿媽苦口婆心咁同我講

「得啦,我自己有計劃,有分寸」我求其hea咗佢

「都唔知佢想點!」「少時唔讀書,大時等乞食啊!」

每日晚飯時候亦都係一種折磨,係餐桌上,日日都要聽佢地不停地講經。

「我食飽喇」

我求其爬完幾口飯,就立即走返入房,鎖門,開電腦,繼續我既廢柴躺平生活。

咦,有新message嗰,係咪肥強搵我打機呢?

「Hi~」

「... Wtfffff!!!」我不禁相信自己隻眼

個..個message竟然係晏晝嗰位女..女仔send...send 嚟?!

「冷靜冷靜,九成九騙案啦!」我自己同自己講

無錯,點會無啦啦有陌生女仔message我啫。一定又係d不知所謂嘅網絡騙案,信嗰個都傻啦。諗到呢到,我不禁為啱啱咁大反應感到尷尬,覺得自己好6uo。

唉,真係恨女恨到傻擦左,燒壞腦。

## Ep5

不過呢排悶悶地,又冇乜嘢做,隻game又玩到悶晒。而且,作為deadline fighter既我唔通真係走去溫書咩,梗係等考前一個禮拜先開始啦。所以,我決定陪個「騙徒」玩吓。

「Halo」「Who r u?」我好簡短咁覆佢兩句

「Be frd?」隔咗大約幾秒,佢立即秒回我

嘩,咁offensive,睇嚟呢個「騙徒」都幾得閒,冇其他target啫,我心諗

「好啊,我叫Jason,你呢?」

我唔係傻嘅,梗係唔會將個真名話俾佢聽啦。

「Jenny」「係呢你f幾啊?」

宜家d騙徒真係好猖狂,講咗兩句就已經想起我底。不過既然決定咗要同佢玩吓,就求其作d野鳩噏啦。

「F5 咦,不過你又點知我係中學生?」

「你係ig嗰bio咪有寫你間中學名囉,點會唔係中學生啫? (笑喊emoji)」

又好似係啫。如果唔係佢提一提我,我都唔會醒起。

「哈哈,你觀察力都幾強啫。」

「係呢點解你會想問我做唔做frd既?」為免俾佢繼續帶我遊花園,順便擺我料,所以我決定先入為主,拎返個對話主導權。

「無啊,悶囉。碌緊ig嗰陣突然見到你,好似幾靚仔,又係讀名校,所以咪膽粗粗咁hi你囉。」

Wtf... 好似幾靚仔?! 雖然我自問唔樣衰啫,但我都未有自信夠膽話自己靚仔...

呢個人相當之有嫌疑,肯定係嚟騙財,或者騙色

「吓...我咁既死樣都算靚仔? (滴汗emoji)」